



河南先生文集卷第十五

誌銘

故天水尹府君墓誌銘

故福建路勸農使兼提點刑獄公事朝奉郎尚

書主客員外郎上輕車都尉耿公墓誌銘

故宣德郎守大理寺丞皮君墓誌銘

故夫人黃氏墓誌銘

故永清軍節度推官宣德郎試大理評事知河

南府澠池縣事侯君墓誌銘

故太常博士致仕何君墓誌銘

故贈秘書丞尤君墓誌銘

故金紫光祿大夫檢校右散騎常侍降授右監
門衛將軍使持節惠州諸軍事惠州刺史兼
御史大夫輕車都尉隴西郡開國侯食邑一
千七百戶李公墓誌銘

故天水尹府君墓誌銘并序

君諱節字守約其先代北人大父暉事後唐為清泰
功臣嘗以節帥彰國軍晉初以忠於舊君遇禍故人

景延廣匿其三子君父其中子也得亡太原及劉氏
据其地以材勇隸帳下為裨校乾德初劉氏大將有
欲其地內屬者謀覺牽聯坐死君尚幼得小校張謙
者持養數年歸於叔父讓、為岢嵐軍使君往來河
西以騎射名軍中從父兄繼倫立功河朔君往依之
補衙內都虞候將奏以官有善相者謂曰君名一戰
即死不則過五十為豐家時相者言它事屢中君決
信不復意仕繼倫卒始來河南因家焉君性剛少長
兵間乘散施以義氣自許與人游處動息持規矩卑

意謹甚以是當世貴人多與之接年五十六某年某月以疾終於家始景氏所匿其長勳後貴顯繼倫其嗣也季即岢嵐軍使唯君父亡他國與兄弟絕故闕其名君娶郭氏治家訓子甚慈而法後君若干年而卒生五子宗溥宗禮宗濟宗泳宗源宗溥宗禮皆早亡宗濟唐州團練推官宗泳給事政府宗源三班偕戢女三人長適尤氏次不嫁俱亡孫七人仲堪業進士仲方大廟齋郎餘並幼景祐五年四月三十日諸子奉君及郭夫人之喪合葬於河南太尉鄉萬安山

之原唐州從事君以誌文為請初予在樞密王丞相府從事君其壻也與之為有舊後予親之喪在外從事君助予奉之以歸是嘗德於予者德且舊於其親之喪是宜為之銘、曰
嗚呼君之生或蹈大義或陷危國家再覆而嗣卒以存其艱甚哉及君之葬子孫寢以仕自進以興其家豈前史所謂有陰德者歟

故福建路勸農使兼提點刑獄公事朝奉郎
尚書主客員外郎上輕車都尉耿公墓誌

銘并序

公諱克從字微之曾祖正祖思唐皆明經術居鄉以
行稱父昭化始以通春秋傳取高第為蜀州司戶叅
軍蜀盜起城破被擒賊將汚以官儕輩莫敢拒司戶
獨叱之且大罵至斬手足死不屈 天子嘉之錄

其後公得同學究出身累調莫州任丘尉冀州司理
叅軍會契丹入寇公率城中豪賈輸軍用下民被兵
皆制以期會又條理獄事與法吏辯刑章常以議直
取勝轉運使劉公綜強力自任於吏事少所推與獨

器公才就荐天雄軍節度推官磁州民有競田者逮
繫百餘人累訴莫能決俾公按其事得寔附曲者咸
坐之既出無一異語知天雄軍王公承衍屢以功狀
稱于朝授大理寺丞權知開封長垣縣事 天子
東封泰山以置頓之勤就移通判利州事歷太子洗
馬殿中丞國子博士通判濟州知鄭州事天禧中河
決東郡詔環決河千里調芻秸輸致之時河南諸郡
久無調發之勞詔暴下吏持之嚴民相驚動有自相
決死者公視番版均其歛無毫釐過繆或貲哀於故

者輕之勝者增之且威信素著吏蓄縮承風音民亦
莫敢自欺郡中肅然事迎以集是時河陽孫公奭為
政尚寬惠而公以嚴明稱安撫使劉公燁使還各以
其績狀聞 真宗顧曰使天下郡守皆如二臣何
憂致治耶劉公因言公位卑宜獎任之於是擢為福
建路勸農使兼提點刑獄公事遷尚書主客員外郎
行部至河州感瘴癘歸以天禧五年終於福州之官
署年四十三公少孤無兄弟事母甚謹故知雜御史
王公濟為常山通守一見以器幹許之遂以女歸焉

及居官廉直果斷不避貴勢所至無留事卒以能稱
其為人尚義節好施與有燕趙遺風初公既位于朝
再贈司戶君為大子中尹母夫人李氏追永樂縣大
君王夫人封太原縣君夫人明達有智略至性過人
少時母孟氏沒虜中夫人未嘗肉食密使謀者訪其
母凡十餘年散父貲數百萬卒得母歸宗党伏某孝
二男長傳將作監丞次知節早卒二女長早卒次適
緱氏主簿高鼎寶元二年十月二十七日監丞君奉
公及夫人之喪葬于河南緱氏唐興鄉解賈村之南

原其銘曰

翔野之氣節士之裔稟乎勁剛承厥忠毅騁才而聞
秉直而遂胡嗇其年弗克其志英河之南得於毫筮
不殞家聲在公之嗣

故宣德郎守大理寺丞累贈司封員外郎

皮公墓誌銘 并序

公諱子良字漢公其先襄陽人曾祖日休避廣明之
難徙籍會稽及錢氏王其地遂依之官太常博士贈
禮部尚書祖光業佐吳越國為其丞相父璨元帥府

判官歸朝歷鴻臚少卿公幼能屬辭淳化中以家集
上獻初尚書以文章取重於咸通乾符世降及丞相
鴻臚皆以文雄江東三世俱有編集總百餘卷至是
悉以奏御得君試對便坐賜出身歷汾州介休并州
榆次二縣主簿時靈夏用師仍歲饋輓公當督其行
不以嚴期暴民事亦以濟遷饒州錄事叅軍無為軍
巢縣令用知己荐授大理寺丞監筠州酒稅大中祥
符七年正月二十五日以疾終于任年五十三公為
吏尚寬平不煩教條所至民宜其治去必見思世為

吳越顯侯樂散施晚年窮匱仰俸入裁自克然均給
踈屬終不少懈知者嘉其孝友夫人管氏賢明有法
度二男長鏞早亡次仲容今為太常博士三女適曹
經宿拱之張奎皆士人二孫公理公高並幼 上籍
田歲公以子五品得以某官告其第夫人封壽安縣
太君明年太君以疾終寶元二年十月二十七日太
博奉公之喪葬河南永安縣某鄉某里壽安縣君祔
焉銘曰

皮氏擅名厥初襄陽後家于南再世以昌公事本朝
其惟舊邦才奮而通命艱弗克公葬河南是成公志
公有令子既孝既禮遂家河南為子孫始

故夫人黃氏墓誌銘并序

河南樂泳來致其父水部君書且自言曰泳母以賢
行稱于外氏以暨我家不幸早世不及封號以歿藁
殯者三十年今葬有日敢因父書求文以誌于壙予
不得讓夫人姓黃氏世衣冠父慶長司勳負外郎母
王氏新泰縣君夫人年二十一為水部配四十二以
疾終于興元之南鄭寶元二年正月六日葬河南永

安唐興鄉渡塔里樂氏自水部君之大父贈兵部侍郎諱史以文章為道儒其後世有顯人遂為河南大族夫人居世次為冢婦性寬裕語言動作為諸女法雖僮侍未嘗聞其厲辭通音律樂施與宗族疎近交稱其德生四子滋進士中第今為著作佐郎後早卒派冲皆舉進士二女長適供奉官馮維禹次適太廟齋郎麻公授水部君名許國以材能為尚書水部負外郎其銘曰
婦道治內潛德弗彰有子而才乃顯其光刻石墓門

圖微不忘

故永清軍節度推官宣德郎試大理評事知

河南府滎池縣事侯君墓誌銘并序

君諱詠字可復其先西河人祖益事後唐武皇起太原軍中從莊宗定河南為中興功臣歷晉漢領兵鎮位至中書令以太子太師還第國初疾薨葬河南遂為河南人父仁浦舉進士早卒君少由進士貢一上不中第用門資得試將作監主簿調處州遂昌縣不赴官歷河中府河東孟州河陰二主簿遷虢州錄事

叅軍郡豪趙寶者殺人誣其庸使代死且賄吏以成其獄君辨狀立正之改武信軍節度推官知河南府壽安縣事秩滿集吏部與儕輩見便坐有詔循一資吏部調君入蜀君求還所循資以待親遂復以節度推官知人名府冠氏縣事又徙河南澠池明道二年八月十三日以疾终于任年五十君生公侯家雖不及見全盛時然從昆弟或陪符錫封建姻王家尚有故時餘風君獨喜儒術與寒士同趣向私室用度委于家史匱豐無所省晚節貲益哀處之自若與人交淡然其久愈固持論議不為貴勢屈知者尚其節初先君既終五月君始生母康氏普州刺史延澤之女明達人也教育以暨成立而君不克終養斯可悲已娶吳氏屯田員外郎祐之之女生二男紹曾紹復皆以廕補官一女嫁王繹寶元二年九月丙午嗣子奉君之喪從葬緱氏原紹曾與予善狀君闕閱俾誌于壙且為之銘

太師維祖武功特起肇開厥家膺受繁祉降及祢廟祭以士礼君奮在初乃試于吏既恬乎中亦遠其志

晚而益艱終則弗遂緱氏之原祔于先子誰復其始
且君之嗣

故太常博士致仕何君墓誌銘 并序

君諱某字某某先京兆咸陽人祖諱朗左司禦率府
卒葬河南新安遂為河南人考諱曦周顯德二年進
士第二人終著作佐郎集賢校理有名於時贈某官
母高氏追封某縣太君三歲而孤養於外氏能自
樹立三十始舉進士五上得同進士出身授儀州司
理叅軍再調開封祥符尉遷果州團練判官又歷鳳

翔彭州河中永興四幙最後以永興軍節度判官告
老除太常博士致仕還洛七年八十三康定二年
六月六日終于家君性通恕善談笑喜人和同然持
身奉法不為強屈嘗與上官爭辯殺人獄終出之後
得刼者衆益伏掌州庾吏襲故迹欲上下通為姦利
憚君初至未有以致其賂乃作匿名書求君黜聰明
拜以金帛投于廨垣君曰是必某吏所為捕送之伏
罪君廉益以聞前後荐其行能者數十人止用選部
循資格增廩祿而已流輩或驟為時用君聞之更有

喜色及退居無分產以自資恬然不以慊其心躰強
無疾一日呼嗣子命以終制語頗詳悉起居猶平常
自是三日而終即以明年四月某日葬于新安縣某
鄉某里凡三娶兩李氏早亡向氏侍中拱之女封某
縣君一子令孫舉進士禮部嘗奏名孝謹有才稱四
女適盧賁李宗孟皆明經宗世賢舉進士王宗諤為
三班借職銘曰
進而益室性為益通處而貧心為自充仁者固得其
壽君子不謂之窮以勤為養以禮送終君寔有子世

其清風

故贈秘書丞左君墓誌銘 并序

康定二年八月日屯田員外郎知華州事河南左君
得告于朝來葬其先君於河南緱氏縣唐興鄉解賈
里先事告同郡尹某曰子始孩先君教以經藝寢為
詞章夙夜以戒曰汝進于學肅于鄉士其以衣冠名
吾家先君既歿三年予取進士第又五年始有位于
朝先君凡再追命為秘書丞自歿距今十有九年始
得用五品禮葬庶幾以卒先志悲乎不及見予之有

成也請予誌其墓君諱某字某其先自河中徙家河
南為大族其交結皆當世豪傑貴人及君乃折節厲
學所友多賢士大夫信讓寬厚為里中稱譽舉進士
一不偶終于家年四十父諱欽母張氏凡三娶兩王
氏繼以韓氏兩王夫人各以福昌永寧太君告第皆
祔于君韓夫人今以萬年受封君六子長瑛及第四
子未名早亡屯田君名瑞寔第二子次珙玘琰係六
人並幼銘曰
富而學不及以位子而才不逮其仕追命既告朝服

以祿養不克兮葬則備方礎刻兮孝子志

故金紫光祿大夫檢校右散騎常侍除授右

監門衛將軍持節惠州諸軍事惠州刺史

兼御史大夫輕車都尉隴西郡開國侯食

邑一千七百戶李公墓誌銘并序

公諱渭字師望其先西河人從祖顏願為周廣順功
臣祖勳始家河陽終右監門衛將軍贈左驍衛將軍
考遜終北部負外郎贈工部尚書妣杜氏進封馮翊
縣太君公少舉進士景德二年中第授許州臨潁縣

主簿歷杭州仁和開封府陽武二尉皆以才能稱用
知己荐除大理寺丞知華州華陰縣事移蜀州江原
遷殿中丞乾興例恩遷太常博士先是河決東郡歷
歲未平公以治河十策為獻會叅知政事魯公宗道
奉詔行河即奏同至東郡時言水利害者甚衆魯公
獨是公策即換此作坊副使充修河都監樞密院有
不快魯公者據公所議與衆不合不復辨曲直罷為
鄆州兵馬都監移知憲州又移鳳州階成二州接邊
頗有內屬之戶故鳳得以戎事制階成猶支郡前北
屬戶攻陷階州之沙灘塞公至郡馳詣其所究治判
狀寬司牧都校趙釗者擾之公即謹釗道州諭以恩
信酋帥皆歎服修復故壘種落遂定以功遷軍器庫
副使知原州事不滿歲改環州遷香藥庫使公緣治
河至是幾十年不待至京師天聖八年召歸奉使契
丹始得對便殿陳畫邊事天子材之使還知慶州事
明道二年詔近臣舉勇畧任邊者公為樞密直學士
李公諮所荐尋加惠州刺史益州路兵馬鈐轄是冬
改元遷東八作使明年擢為西上閣門使旋改廊延

路兵馬鈴轄廊延屬戶比他路為最強多寵以右或
要官部下恣誅殺敢為不法異時主兵者頗務姑息
或利其善馬求取無厭公是凡所饋獻一不納罪者
繩以漢刑皆樂公之不擾然畏憚莫得自恣焉秩滿
知延州郭公勸美公鎮靜之績奏留再其任又脩其
勞狀于政府言甚切至詔就遷東上閣門使旋改四
方館使始趙德明內附先帝與之約令其入貢京師
道必從廊延文奏非廊延不得通自是文牒往返如
隣州元昊初襲爵土公即帥廊延兵元昊雖桀驁嘗
擾環慶戎落然歸罪別種以為詞公為報不與之辨
齊宗矩以慶州之兵敗于節義烽為虜所得公以文
諭之虜即以宗矩來還 朝廷亦不發其罪寶元
元年元昊大將山遇者率其族三千餘人來歸且言
元昊不執狀公與郭公議曰元昊猖獗之志由宗軌
敗益彰非待山遇發也自德明納貢四十年其酋長
內附者未嘗納之國家于德明父子撫愛哺養如嬰
兒豈有毫髮負哉今若納其亡人使其取直以為稱
是中國大信天子含容之德由吾輩所虧損也即境

上繩之其年冬南郊貢輸不至十二月遣其党称所
置偽官以來公即拘其人于館亟以事聞且閱其表
函猶称臣以冠其名公即與郭公議奏以夷狄僭中
國名號誠不順然尚称臣可漸以礼屈願與大臣熟
議天子方命帥臣經畧兩事所奏忤旨前此就移兼
領鄜州至是降授尚食使知汝州事数月移磁州明
年有上書訟公前絕山遇事者又降為右監門將軍
白州兵馬都監久之寢疾語諸子曰吾在西邊十餘
年雖以罪去猶願一見上陳當今制虜之宜死且不
恨今不幸遂塞而不伸予以康定二年四月一日終
于官年六十三自公再被黜典皆與郭公同命公既
終一月朝廷起郭公知鳳翔府事次子先因遺奏特
授守祕書省校書郎識者悼公之歿焉公初娶張氏
封清河縣君繼崔氏封壽安縣君二子長曰兢東州
節度推官次即校書郎皆勤學有才称一女尚幼即
以其年十二月十八日葬于河府河南縣龍門鄉南
五里銘曰

自古四夷或侮或順以威以懷世其異論在公之策

羈縻示信蹟而不復歿有遺恨匪身之謀唯國之狗
刺此銘章載其忠憤

河南先生文集卷第十五

河南先生文集卷第十六

誌銘

故朝散大夫尚書兵部郎中知蘄州軍、州兼
管內勸農事護軍賜紫金魚袋張公墓誌銘

故大中大夫右諫議大夫上柱國南陽縣開國
男食邑三百戶賜紫金魚袋贈太傅韓公墓

誌銘

故兩浙轉運使尚書司封員外郎護軍賜紫金
魚袋韓公墓誌銘

故朝奉郎尚書司門員外郎通判河南府西京
留守司兼畿內勸農事上輕車都尉賜緋魚
袋盧公墓誌銘

故西京左藏庫使銀青光祿大夫檢校工部尚
書使持節普州諸軍事普州刺史兼御史大
夫充廣南東路駐泊兵馬鈐轄兼提舉本路
巡檢兵馬賊盜公事上柱國太原縣開國伯
食邑九百戶王公墓誌銘

故朝散大夫尚書兵部郎中知蘄州軍州兼管
內勸農事護軍賜紫魚袋張公墓誌銘

公諱弇字漢臣其先魏郡人唐末從祖有官河陽者
舉族因遷河陽世服儒衣冠無顯者父用贈光祿大
夫母某氏贈某縣太君公英光祿河南遂為河南人
景德二年再舉進士中第歷宜州寧國封開中二年二
縣主簿泉州晉江尉用荐者改著作佐郎遷秘書丞
太常博士知并州榆次楊州天長二縣通判杭州事
入尚書省歷屯田都官員外郎知文州蔡州事賜五
品服提點開封府諸縣刑獄公事轉司勳員外郎知

明州事就遷祠部郎中召還擢為刑部郎中荆王府
翊善賜三品服兼判司農事實元二年以疾辭出知
徐州事進兵部郎中移蘄州康定元年五月終于郡
年六十二公五歲而孤母夫人携以歸其族從師學
既冠善屬辭博涉經史河南素多士公晚輩穎然見
文采亟與知名者游衆不敢以門寒後公個儁尚義
節居貧以約自守未嘗假所不足于人、有伺顏色
而進誠者公審其果善士乃承其意後皆重償之無
一不報厚朋友險夷共之人莫能致其間言其人歿

雖久有妄評其短者公嫉之終身為著作佐郎葬母
或率錢數十萬為助者公曰吾以士葬親於禮無慊
者惡用贖為乃謝不受其為政待吏甚察然寬民緩
徭不喜刻削宰天長尤以治稱有錢蒙吉者作天長
善政說以美焉在杭州會軍士以三司所給賚物疏
惡喧噪趨牙門公即馳往諭之衆乃定至書褒美屢
平疑獄後得有罪者事登白佐王府未嘗以柔愉見
言色進退必以莊其剛守類皆若此然亦以是卒不
顯貴娶陳氏封福昌縣君後公數月而終子彥伯某

州某縣主簿慶仲寧州安定主簿慶曆四年十二月
二子奉公及福昌君之喪葬于河南之龍門山乃銘
曰
閔放其通強毅其守行隆州邦信在朋友為政之仁
在民則厚考古循良孰我先後匪豐其祿又奪之壽
獨茲令名是謂不朽

故大中大夫右諫議大夫上柱國南陽縣開
國男食邑三百戶賜紫金魚袋贈太傅韓

公墓誌銘 并序

公諱國華字其其先深州博野人世衣冠舊族四代
祖人賓當王景崇襲有鎮冀四州佐其府累官檢校
太子左庶子兼御史中丞景崇於河朔諸鎮中輸責
最為恭順由庶子漸劇以德義故以功名始終庶子
生四子韞辭慎辭定辭昌辭皆以才名為王鎔賓屬
于時鎔府號多賢士定辭嘗以掌書記聘幽州時燕
客馬或名北門舊儒以博洽相尚或大屈伏昌辭終
真定府鼓城令即公之曾祖也生廣晉府永濟令諱
璆違張文禮之難徙趙郡以文知名與李崧徐台符

為友二公文荐其才會疾不起徐作詩以為當世朋
友無復繼者李卒以兄子歸韓氏寔趙郡太夫人永
濟生太子中允知康州事諱今上御名始遷相州安陽遂
為安陽人屢為藩鎮辟署敏書奏時推其工嘗宰真
州清河作條教諭民以不擾能信其言所至以寬良
稱公即康州之第四子年十九舉進士大平興國二
年天子初御殿覆試上第為大理評事通判瀘州四
年代還授太子右贊善大夫旋以例補外曠授安德
軍節度判官七年除秘書省著作郎監蔡州稅雍熙

元年遷監察御史三年假太常少卿使高麗還拜右
拾遺直史館賜五品服四年充三司開拆司推官尋
改主判開拆司累遷左司諫刑兵二部貲外郎帖昭
文或賜三品服凡三為監鈇判官又為左討司判官
判戶部勾院都判三司勾院至道二年以屯田郎中
充京東轉運副使移峽路轉運使真宗聽政遷都官
郎中還朝權判大理寺出知河陽咸平四年就遷或
方郎中移知潞州事景德三年假秘書監使契丹還
為江南巡撫使入權開封府判官四年車駕拜陵權

領曹州事召歸授太常少卿知泉州事大中祥符元年拜右諫議大夫四年代還道病三月十一日終于建州之傳舍年五十有五公為文章不尚靡放辭達而意不窘進止威嚴目不妄視佐彰德軍年尚少鄉里多識公出觀者決路或相語得韓公左右願當其肴酒其重若此雍熙中王師北伐聞高麗與契丹嘗為仇怨命公諭旨以分虜勢公至其王治畏虜無報復意公為陳中國威略動以禍福乃承認然遷延師期公曰兵不即發不若勿奉詔出不及虜境不若勿

發兵口語激切又繼以書至十返治憚公堅正知大國不可欺乃命其大相韓光元輔趙杭兵二萬五千以侵虜且俾光等率將校詣公、猶留館須其兵出境乃復命淳化二年契丹大將蕭寧遣人抵雄州請和天子疑其詐命公馳往公代州將劉福作書與寧鈎致其情得寧答詞前後反覆無所依由是悉見其偽狀在三司更張事凡二十七條其興利使民樂趨而上收其贏其立法使人易守而難犯故所施置通久而少弊臨上党會虜寇河朔上党與趙魏地最親

公辨嚴修訓簡器供餉皆先事區處民以無擾詔書
褒美初太宗親擇材臣有由外庭小官不勾歲柄
用者公忠力不懈天子深器其能而為見忌者所排
故位不甚進然益任以事留京凡十年舊三司判官
不兼三館或事公為監鈇特命直昭文館判官帖館
或自公始真宗緣先帝意以名臣待公開封嘗
繫囚數百委公決之江外阻飢命公撫之皆以任事
稱北方請盟之明年公以使往諭曰卿昔使高麗
故以選卿又願同使周漸張若谷曰卿凡事嘗詢韓

某公性既任直無所附合持樞者復不為推引更歷
中外垂四十年位終諫大夫于時皆嘆其滯然公亦
不壽故不究其用迹其行事皆得舒發所蘊未嘗沮
撓又被顧兩朝為縉紳屬目非不遇也公既歿泉人
之有知者相與趨建陽泮奠朝夕哭詣浮圖營齋以
報公德其寬愛感人至此公閎達有度量與人語言
盡誠無隱非議戎事未嘗及權教自以少孤見祿及
親者必撫然感傷篤愛親族姑姊教人孀且老皆迎
以歸事之甚謹外兄弟甥姪悉為其婚嫁清約自守

家無餘資諸子皆訓以經藝例恩得任子多抑之頃
其成立然後奏以官及公之終未官有三人夫人羅
氏諫議大夫延吉之女鄴王紹威之孫封宜城縣君
子六人球湖州德清尉瑄將作監主簿琚司封負外
郎琬河陽司法叅軍璣著作佐郎琦右諫議大夫樞
密副使一女嫁西上閣門使高志寧樞密之兄弟今
無存者初司封登朝與樞密並贈公吏部尚書慶曆
三年樞密追榮三代贈公太傅妣羅氏追封仁壽郡
夫人大父贈太子少傅妣李氏封趙郡太夫人曾大
父贈太子少保妣張氏封清河郡夫人五年二月某
日樞密奉公夫人之喪歸葬於相州安陽縣之新安
村距祖塋三十里其銘曰
韓氏自唐載德以世丁時孔艱秉節愈厲公奮在初
才克有濟曰州曰邦以功以事豈不較利 勿儻
亦既立法究窮罔敷布威東夷申化南裔維皇之咨
宜輔于治若時之瞻則協于義年胡弗淑位胡弗至
靡人不嗟彼蒼誰懟在子而昌寔公之嗣衮服以章
葬則有制豆籩式嘉祭則備器孝子有家傳千百祀

故兩浙轉運使朝奉郎尚書司封員外郎護
軍賜紫金魚袋韓公墓誌銘并序

公諱垢字子溫相州安陽人右諫議大夫贈太傅韓
國華之第三子幼敏慧太傅愛異諸子凡有譔述令
執筆口授之由是盡得屬詞之體以蔭試將作監主
簿調饒州鄱陽尉大中祥符七年求應進士舉郡守
江嗣宗素未知名一日召登郡閣出鴻雁來賓賦題
以試之少頃即就格致清麗有唐人之風江大稱賞
即時荐送江左有書其賦于屏者其愛重如此明年

中第授太常寺奉禮郎知河南府永寧縣事時王公
嗣宗守河南政尚嚴察束官吏一以法細民或縣訟
不勝率走府自直屬官畏慄益顧慮不任事頗以疲
軟罷永寧在河南名最劇縣公年少果敢善決斷民
吏愛伏王公嘉之遂不奪其治且薦于朝用荐移通
判廣信軍事丁內艱服除累遷光祿丞秘書郎太常
丞歷通判趙祁虔三州事虔于西江號難治民喜訟
或偽作寃狀悲憤叫呼似若可信者非久于政莫能
辯公至會守缺代行郡事能究其風俗不為聰明不

作條教因事以考其枉直下莫能欺詞伏者自以為
不寬召還為郡牧判官賜五品服張文節公秉政嘉
公文行令以所著篇集上獻且以姓名寘佩囊中將
荐之會薨遂寢初公在趙州曹韓公利用以其鄉里
善公之政及郡牧判官缺奏公補其任曹得罪出通
判濠州事轉太常博士尚書屯田都官負外郎知黃
州澤州事京西路提點刑獄時西京天宮白馬寺並
營浮圖募衆出金錢費且億萬權臣為倡首旁郡承
風指塗商里豪更相訛導附嚮者惟恐後公抗疏言

狀罷之就移福建路又改廣南西路轉運使安化州
蠻叛殺宜州守將王世寧朝廷遣將加兵復詢公制
賊利害公上言蠻負險攻之則竄保巖洞嶮絕不可
窮其迹置之則時出侵掠恣為人害師久留屯復多
疾癘物故為令策莫若盛兵逼其巢穴示以開納蠻
必畏威歎附然後罷遣屯戍增募土兵守其要害宜
不能復叛其後卒如公策嶺表久無事兵暴起轉糧
糗具器械公處置皆有方不嚴期促辦而軍用以濟
朝廷嘉之就遷司封還朝賜三品服判三司都理欠

憑由司康定元年夏出為兩浙轉運使次潤州以疾
終年五十一公性至清慎動自檢察他人視之以為
難常而公持之終身父兄既歿撫養弟姪極其恩意
間或文酒相懽門庭之內自為師友有行事不如意
者委曲開諭未嘗及以惡詞故教率教誼競自樹立
為公之季弟樞密副使琦以慶曆三年追榮三代故
公之曾祖廣晉府永濟令諱璆太子少保祖太子中
允諱 贈太子太僕太傅夫人羅氏追封仁壽郡太
夫人公娶李氏封壽春縣君公歿纔數月而逝四男

景融將作監主簿性和雅善屬文後公五歲亡方彥
試秘書省校書郎直彥孝彥並太廟齋郎四女長適
著作佐郎葉仲舒次早卒次適左侍禁曹測次適殿
中丞范寬之五年二月二十二日樞密奉太傅太夫
人及公之喪葬於安陽之新安村李氏祔焉銘曰
虔州之治可以觀公之政文節之知可以觀公之行
持清太高寧或訛評篤愛過慈寔其資性蹈中弗越
秉常以正嗚呼厚其稟而嗇其享焉得以言命

故朝奉郎尚書司門員外郎通判河南府西

京留守司兼畿內勸農事上輕車都尉賜
緋魚袋盧公墓誌銘并序

公諱察字隱之河內人舉進士授復州司士叅軍累
調光化軍乾德衰州襄陽二主簿夔州復節令泉州
觀察推官遷大理寺丞登朝為太子中舍殿中丞國
子博士入尚書省為水部司門員外郎凡歷知河南
密江陵公安彭州永昌三縣知蒙州事白波發運判
官最後通判河南府事實元二年八月十日以疾終
于官年五十五初公景德初以進士貢有名稱禮部

荐在高等有以先相名聞者且曰盧某男不當與科
第上亟命以官吏部復持公年未中格遂以閑曹授
之公既見詆於時益以風節自勵所至朝夕勤事勇
于行已不以上官不合易其守前後所新疑獄濟飢
民發奸吏復逋亡所部監司以真狀為荐者相繼始
終以幹理聞能為古文章有集三十卷別著晦書一
卷靈感誌三卷注孫子三卷雅愛太玄為之注未成
臨終命焚之獨留一篇并序且曰後世必有吾繼者
善撫宗屬及姊妹子之無依者親為嫁娶幾十人篤

尚風義侍御史臧奎於公有舊恩名其次子示不忘
臧氏景祐中嘗得召對從容叙及丞相得罪事言已
流涕上感動即贈丞相工部尚書夫人蘓氏追封河
南郡太夫人初丞相以兵部尚書相太宗後徙朱崖
雍熙二年以疾終其九月公始生公感家世蒙禍居常
自傷至是五十年追命常伯卒獲其志世皆異焉蘓
夫人漢相禹珪之女當丞相貴封國夫人公祖諱
億少府監嘗贈太師母李氏鄭國太夫人公娶張氏
封清河縣君其父文勝為達州司理叅軍遇盜起迫

署以官不屈以兵死公之子九人戡臧城成戡鉞戡
戒臧城有文行早世戡成戡鉞戡皆幼亡臧以進士
第為河陽尉戒臧並學為詞章二女一夫亡一未嫁
孫壽康壽寧壽祺尚幼慶曆三年十月辛酉臧奉公
及清河君之喪葬于河陽某村之西北原銘曰
既艱其生又窒其仕匪俗以同兮將永曠公秉常兮
方以厲道不屈兮文益肆追命其先兮如始至惟此
孝心兮德之至能銘其烈兮公之嗣

故兩京左藏庫使銀青光祿大夫檢校工部

尚書使持節晉州諸軍事晉州刺史兼御
史大夫充廣南東路駐泊兵馬鈐轄兼提
舉本路巡檢兵馬賊盜公事上柱國太原
縣開國伯食邑九百戶王公墓誌銘

公諱世隆字可久其先自澶淵徙河南今為河南人
少舉明經上第授洪州分寧主簿累調涇州司法叅
軍越州山陰縣秦州錄事叅軍遷大理寺丞歷太子
中舍殿中丞國子博士尚書虞比駕三曹負外郎換
左藏庫使改左領軍衛大將軍致仕復為左藏庫使
領普州刺史由大理寺丞至負外郎凡歷監台州酒
稅知河南府壽安縣事徙知雲安軍通判邠秦二州
事由左藏庫使知夔州事起致仕知登州事移廣南
東路兵馬鈐轄行次南雄州慶曆二年二月二十日
無疾終於館年六十七公性通明其為吏事雖細微
處之極精或事劇體鉅他人蓄縮不敢議決之益不
疑卒無纖毫差失所至以材聞在秦州會曹公瑋治
兵扞戎命主儲向曹公表公能辦賊雖軍事亦與謀
議遂力荐之明道中歲大飢公為坊州出廩粟以賑

民僚吏固曰必待報公曰民方徙溝壑緩之困將日甚天子至仁必不以加罪縱異此吾任之無恨公始緣曹公荐世多知其有文略王丞相隨典樞密言公策略可試遂領使賊及以疾致仕還洛而疾平會張定公以留守入相嘉公精力且惜其材乃復起之公重厚寬愛不務峻刻於治獄尤尚平允僚屬有一善孜孜稱道御士卒亦隨其所任不強其不能下亦樂為盡力劇飲至醉不乱父應之累贈屯田員外郎母諸葛氏追封永寧縣大君娶董氏封金華縣君二男沂右班殿直炳河南河清縣主簿四女皆適士族慶曆五年七月五日沂炳奉公之喪葬于河南縣洛苑鄉司徒里銘曰失文

河南先生文集卷第十七

誌銘祭文

故金紫光祿大夫秘書監致仕上柱國清河縣
開國子食邑六百戶食寔封一百戶張公墓

誌銘

故朝奉郎司封員外郎直史館柱國賜緋魚袋
張公墓誌銘

故朝散大夫尚書司封郎中充祕閣校理知均
州軍事兼管內勸農事上柱國李公墓誌

銘

故將仕郎守瀛州樂壽縣尉任君墓誌銘

祭僕射王沂公文

祭謝舍人文

故金紫光祿大夫秘書監致仕上柱國清河
縣開國子食邑六百戶食寔封一百戶張

公墓誌銘并序

公諱宗誨字其其先曹州宛句人大父諱某避亂徙
河南遂為河南人父諱齊賢以道德名望相 太宗

真宗贈太師尚書令中書令英國公母崔氏秦國

太夫人公以廕為秘書省正字四遷至太子中舍監

騏驥倉西京左藏庫在京左藏金銀庫召試賜進士

第累遷秘書省著作郎太常博士尚書屯田都官駁

方三負外郎歷監香藥榷易院同判國子監判尚書

祠部吏部南曹登聞鼓院出通判河陽知富順監入

為開封府判官進祠部郎中判三司度支句院出京

東轉運使徙河北罷知徐州更兵部刑部二郎中太

常少卿除檢校工部尚書文州刺史充四方館使知

代州徙衛州加果州團練使永興軍兵馬鈐轄移廊
延路鈐轄兼知鄜州嘉興州防禦使復永興軍鈐轄
未至改知邠州抗章請老以秘書監致仕慶曆五年
閏五月一日薨于河南會節坊之私第年七十有七
公未冠從英公鎮代地屬楊繼業初沒虜數出擾邊
英公敗之城下邀擊于土墪虜又敗復用奇兵破其
數萬衆于繁時當是時代兵驟勝朝廷倚重英公
公朝夕左右預參密畫或俾按視行列傳布號令公
亦善騎射馳突往返幾危者數矣由是以知勇聞

太宗常遣使代郡諭英公曰善視此兒吾行將用之
會英公以功入輔深抑子弟私恩故前勤不叙公與
仲弟宗禮舉進士有文稱復羅之不令與寒士爭名
訖英公再秉政仕不出筦庫景德初制以六科取士
公上安邊議求以武足安邊科自試不報大中祥符
中增前議為三十卷詔學士院召試初英公論符瑞
及修宥事有大臣之言頗與當時得幸者意異至是
公止改署國子監事天禧中河決東郡並河千里輸
芟薪完復故道暴吏嚴期民力不能致將以藉違取

罪有持金錢自經者公請少緩之且損其數車三上
言益激至頗采用焉在富順監會夷人斗郎春叛群
醜寢騷公遣使撫之不即從公曰夷恬吾撫安謂吾
兵力不制怠甚矣自將州兵攻之夷衆數千來戰公
分兵為三鼓破之進拔其四撫夷僚遂定監司害其
功不即聞代還 朝廷褒之為開封府通判自是數
進見所論多邊事嘗曰虜貪而尚戰國家羈縻二方
予厚而備死非久策也然羗必先叛其酋悍而不仁
始嗣而用其衆西涼故地且盡之矣恃其武必肆於

大國及換使或不三年夏貢不至朝廷思公前議進
領圍結往護西師辭日對數刻訪以九事一國體二
易義餘悉兵家竒正之說公敷答明審上慰遣之在
鄜州范忠獻公鎮延安以舊臣密訪計議公以虜勢
未易輕凡戰聞戒在趨利未幾劉平石元孫敗沒黃
德和遁還延州不納又走鄜州公曰軍奔將惧而無
歸所以取亂也乃納之拘德和於館撫其傷夷鄜城
大而不完公方議新之會虜騎驟至是時天下久安
人不知兵上下惴恐將奔竄山谷公舉措不失常度

號令齊一嚴外候謹門防籍入而禁出索材簡器補
葺罅漏者勿疲瘵使之各任其力一夕而城守皆具
外姦莫能窺其隙虜知有備乃去以功有興州之拜
且許便宜從事初公在代告老不久會興西歸遂以
疆事自力至是朝廷益發屯兵增遣近臣護軍公復
內徙廼曰吾當得請矣平如初志公漸英公之訓以
愛民恕物為任凡治民必先本風俗尚儉節教之殖木
藝穀以資其生故民蒙其利而懷其愛其刺舉外部
吏屬不戢者直其罪扶不隱微數議刑章或引律比

者多傳於世故號稱寬平通經術明治亂陰陽象緯
之書叢詞萃說錯見互出世所難曉者公鈎淵發源
貫穿條理無不浹洽尤長於軍志前古用兵皆能辨
其所以為勝負施於今若無窮惜其被遇已晚不完
其用良可悲已宗族因公官者十餘人其保任不間
疎近皆以年為先後故諸孫多未仕者初公以雍熙
甲申始官秘書局逮康定庚辰^凡五十七年以大秘書
還第体強力完神清識明康寧壽考時罕其比有文
集若干卷別著刻漏記花木編二卷夫人呂氏封馮

翊縣君以次子讓例恩追封東平郡君子七人長子
臯終司封負外郎直史館次未名早世次子憲刑部
郎中次子文終大理評事次子庚大理寺丞次子定
屯田負外郎次不育女三人二早世一適崇儀副使
馬成美慶曆七年二月某日刑部及二弟奉公大夫
人之喪葬于河南某鄉之某原其銘曰

在昔夏方王貢以共衆恬于安作兵為凶公奮獨議
備茲寇戎公守于廊虜侵其封保無堅壁戰無選鋒
公寔始至群心未通士民惴恐誰謀之從公一號令

其趨如風鼓金其聲旌旗其容虜知我備莫予敢攻
內外安堵繫公之功公識孰先公才孰雄孰艱其位
有志弗克於昭太師元台上公公實嗣之顯而未融
世德益茂陽報其豐有子有孫慶流無窮

故朝奉郎司封負外郎直史館柱國賜緋魚

張公墓誌銘 并序

河南張公諱子臯字叔謨以康定元年七月二日卒
于東都道德坊之私第其從父弟子真狀其行實曰
吾兄以文章名于時孝友稱于家識者以為必能繼

乃祖丞相之烈雖吾兄弟亦推之曰是將復興吾宗
不幸始壯被譴遭回坎壈以至於沒得非命歟今年
其仲弟子憲以書來求銘將以慶曆七年二月某日
葬于河南某鄉之某原嗟予予獲見於公固久嘗語
予曰吾交天下士多矣然不以通否易意者子也公
知予若是不誌其墓曷舒予悲公之先濟陰人曾大
父冀公始遷河南祖諱齊賢司空贈尚書令英國公
父諱宗誨秘書監母呂氏東平郡君公幼而才敏景
德四年己酉十八舉進士辭章傑異時輩馳名聲者

皆出其下明年取甲科試校書郎知鄭州新鄭縣事
遷保平章節度推官英公奏授校書郎館閣讀書于
時朝廷尊瑞命修禮之從官及儒學之士率獻賦訟
以稱上德其華潤典美布於人誦者蓋才一二公雖
蚤少秩卑而常得預焉由是天子知其名擢為著
作佐郎諸公皆出其門下公益自樹立少所附合寇
萊公深器之會留守西都奏掌磨勘勾院寔主記室
萊公移京兆復奏知萬年縣事轉秘書丞館閣校勘
召試直史館初公在雍喪配萊公意以女歸之而未

成也萊公罷相始婚于寇氏及其南遷公坐姻戚出
監西京監院俄落史或監撫州稅降大理寺丞久之
代還監西京洛河竹木務天聖四年始遷殿中丞知
河南縣治尚寬平獨吏為嚴民有訟者止辨其曲直
鮮繩以法故去而見思歷太常博士監西染院進屯
田負外郎判吏部南曹明道二年令宮傳李丞相秉
政萊公事得聖復公史或遷度支負外郎掌太常禮
院逾年李丞相罷為奉常公亦出知慶成軍徙知陵
州以郡入田租素厚求易他郡得邛州未行改通判

鄧州。將素貴他時佐郡者多誣礼事之公曰朝廷
之儀貴賤有常制苟過之非所以愛國体安大臣也
持己必以礼無毫釐過差人以為難轉司封負外郎
寶元二年還朝命決畿内獄未幾暴疾數刻而亟年
五十有一公生貴家少年取聞於時論議有風未雖
韻格素高而不自矜負人亦樂與之游初坐萊公事
嫉寇者皆嫉之及李丞相罷與李異者復擠之然公
於人未始有仇也世所謂朋党者果在此耶在彼耶
人不吾辨也公既見擠廢官於洛及得告前後幾十

餘年洛中有英公別墅常與親舊縱遊觴咏自適向
時榮名擺落殆盡縉紳有驟為時用者公禮之如進
在已先循、然不慊於色他人問公不遇為窮公不
自窮也有文集若干卷娶白氏繼寇氏某縣居三子
仲武某官仲哀舉進士今亡仲友某官女適進士李
希甫銘曰

吾觀人之情莫不以顯榮為通誦辱為窮然死之日
曾無銖兩之異焉獨善惡之著其人雖沒其名猶存
必視其巨細為世之近遠故君子置彼而忘此若公

者進必由其善絀不自其身於其生猶不自謂之窮
况其歿耶然公之才名卒顯於世嗚呼遠哉

故朝散大夫尚書司封郎中充秘閣校理知

均州事軍兼管內勸農事上柱國李公墓

誌銘 并序

公諱垂字舜工博州聊城人咸平中舉進士初命解
州聞喜尉換州司法再調湖州錄事參軍召試為崇
文院校勘改秘書省著作佐郎遷著作郎秘閣校理
歷太常博士尚書祠部度支司封三曹員外郎、中

由校理監裁造院判三司理欠憑由司同修起居注
出知毫穎晉絳均五州事年六十九以明道二年六
月二十五日疾終于武當公始舉進士上兵制書大
要論國家常率丁民為兵而群下搔動田籍不先定
故也今莫若覈民數於籍十一而附六十除之二十
五十者皆兵部伍有等更休有法則三代之制可
漸復也又上將制書皆推本仁義節制之說於時號
為北州大儒及在祕閣陳導河形勝書言春秋二百
四十二年災異畢書獨不書河決者夏禹故道存也

今河勢益北因此可遂復故道及天禧後河數決命
公馳傳行堤公守前議稱勿塞便執政者意異議遂
後既塞復決卒如其策國史取公策以脩河渠志焉
故事禁中須物黃門署上旨促辦公在憑由司議令
諸司驗至文乃承認遂為常制丁晉公秉政公掌右
史未嘗通私謁丁寢不喜求公治亳州章入命未下
已俾代公者領事人或為公憤者公曰吾得請矣終
身無一言及丁氏凡為郡不煩教條不嚴期所至人
安其治有古循吏之風延接士子必譽其長而進其

未至其志在長發如此文章尚典正最明於制度群書百家無不通尤邃地理志天聖中頗用舊老典贊書公在儒館德齒俱先又素望甚高而以足疾頻求外郡庸非命耶所著文集摠三十卷公之祖父皆以隱德推于州里贈衛尉卿諱筠扶風縣太君耿氏公之考妣也娶劉氏封彭城縣君奉先姑以勤孝事公以柔明御家以慈肅後公十二年以慶曆五年八月二十三日終于寧州官舍五男伯昂知江陵府潛江縣事仲昌大理寺丞監寧州酒稅叔旦寧州彭原縣

主簿次二子未名早亡二女長適鄆州須城主簿范孝孫次適將作監主簿崔植孫男二人惟和郊社掌座惟穉業進士孫女五人長適進士張閎次並幼初武當道南陽愛其土風遂營居焉彭城君既沒其九月仲昌叔旦護其喪自北幽來歸南陽伯昂自武當奉公之喪以某年十二月庚申合葬于鄆州穰縣禮義鄉于保里從先命也銘曰

性哲而明志厲而堅在儒為醇在德為全導河以勢籍民以年議無汙卑詞追古先始葬于穰自公所遷

刻此銘章以永其傳

故將仕郎守瀛州樂壽縣尉任君墓誌銘并

序

南陽掾任據告予曰據不幸始生而喪先人養於母氏既有知然後審先人之未葬願弱且貧力不足以襄事危乎其不得葬也天假其生得吏郎縣月有廩入以遂其初志將以某年某月日葬于汝州郊城之某鄉某原願寘方石以銘其諱氏予閱掾艱窮奮厲以克有立又嘉其粗能道其先之行實故為之誌云

君諱某氏某

州清河人治五經盡明其章句大義

授經者凡數十人工部尚書趙公昌言召館門下趙

公個僥尚義節君不專經藝取合特以性識敏辨議

論感慨故始終禮異加強記絕人趙公常令讀道上

碑再遇則能默誦咸平初中第補京兆高陵尉再調

瀛州樂壽尉居官頗有荐其能者景德元年四月十

一日以疾終于官年六十娶朱氏生子二長曰希次

即掾今為君後銘曰

古者士葬以踰月傳載改葬服總者謂葬不如禮或

墓壞而遷非不即葬也近代拘陰陽之說有再世未
葬者不其酷哉亦有力不足者始君沒四紀而始葬
其嗣非不為蓋不能也殆與前所記者異矣

祭僕射王沂公文

年月日故吏尹某謹以清酌之奠敢昭告于故資政
殿大學士僕射相國沂公之靈景祐初公臨洛師某
在幕府公以才敏見目數被器使議獄處事某或依
違其言公必丁寧勗以正道及公再秉大政嘗以身
事有請門下公莊色厲詞不少恩假某始惧中慊終
則大悟嗚呼凡公語言雖因事見誨然公在大位默
不敢傳公今薨謝輒錄以自思一言之誣天寔鑿之
以哀服不獲備故吏之列情禮莫伸嗚呼哀哉

祭謝舍人文

年月日具位尹某謹以清酌庶羞之奠敢昭告于故副
閣舍人陽夏公之靈某仰公德望固為前輩至于年
齒差長七歲耳世路相期在于白首故別去不甚為
戚、相遠不數為書問公之聰明宏達守以仁厚論
者咸謂宜貴且壽况復術士言輿論者頗合蓋不慮

有意外事聞訃之日既駭且疑公体素強不聞有疾
且論者與術士言不宜繆異若此豈傳者妄耶久之
自解曰聖人謂仁者壽而顏子短命論者烏能先識
哉術士言固不足信雖体強無疾寧必其長年耶審
是傳者不妄也嗚呼某與公別五年嘗以書期今年
秋往詣郡下前日叔謨來言公于客坐中日某信士
期之必至既而某用家事卒不得往又不作書以道
所不往意使公言為無驗此大恨也誠以公方且貴
盛如前所稱故不汲于_一見向知公至是雖數千

里猶當一往况不及千里耶復念在洛日聽公政事
辨隱處疑亦有異論公或意悟歡如已出某雖理屈
情詞無嫌非公盡誠孰能使某如是嗚呼公存天下
所仰公沒天下所哀以衆人之哀又益以私恩其為
鄙心可復道哉臨紙悲塞萬不一伸嗚呼哀哉伏惟
尚嚮



